

Na osnovu člana 8. stav 8. Uredbe o postupku prijema u radni odnos u javnom sektoru na teritoriji Kantona Sarajevo („Službene novine Kantona Sarajevo“ broj 19/21, 10/22 i 28/23), Komisija za provođenje javnog oglasa za prijem radnika u radni odnos u JU „Kantonalni centar za socijalni rad“ imenovana rješenjem direktora, broj: 31-01/06-120-1417.1/23 od 22.08.2023. godini na sjednici održanoj dana 30.08.2023. godine, donosi

**POSLOVNIK O RADU KOMISIJE  
ZA PROVOĐENJE JAVNOG OGLASA ZA PRIJEM U RADNI ODNOS  
NA NEODREĐENO VRIJEME U  
JU „KANTONALNI CENTAR ZA SOCIJALNI RAD“**

**I – OPĆE ODREDBE**

**Član 1.**

**(Predmet Poslovnika)**

Ovim Poslovníkom se uređuje način rada i odlučivanja Komisije za provođenje javnog oglasa (u daljem tekstu: Komisija), način provođenja i vrednovanja pismenog i usmenog dijela ispita, kao i druga pitanja od značaja za rad Komisije za prijem radnika u radni odnos na neodređeno vrijeme za slijedeća radna mjesta po pozicijama:

1. **Stručni saradnik – socijalni radnik..... 1 (jedan) izvršilac**, u Službi socijalne zaštite općine Novo Sarajevo;
2. **Viši stručni saradnik – socijalni radnik..... 1 (jedan) izvršilac**, u Službi socijalne zaštite općine Novi Grad;
3. **Viši stručni saradnik – socijalni radnik..... 1 (jedan) izvršilac**, u Službi socijalne zaštite općine Hadžići;
4. **Viši stručni saradnik – socijalni radnik..... 1 (jedan) izvršilac**, u Službi socijalne zaštite općine Centar;
5. **Viši stručni saradnik – socijalni radnik..... 1 (jedan) izvršilac**, u Službi socijalne zaštite općine Stari Grad;
6. **Viši stručni saradnik – socijalni radnik..... 1 (jedan) izvršilac**, u Službi socijalne zaštite općine Vogošća;
7. **Stručni savjetnik – socijalni radnik..... 1 (jedan) izvršilac**, u Službi socijalne zaštite općine Ilijaš;
8. **Viši referent administracije..... 1 (jedan) izvršilac**, u Službi za hraniteljstvo;
9. **Viši referent – operater..... 1 (jedan) izvršilac**, u Službi socijalne zaštite općine Novi Grad;
10. **Čistačica – kurir..... 1 (jedan) izvršilac**, u Službi socijalne zaštite općine Novi Grad;
11. **Čistačica – kurir..... 1 (jedan) izvršilac**, u Službi za hraniteljstvo.

## **Član 2.**

### **(Postupanje u skladu sa propisima)**

Postupak javnog oglasa i izbora kandidata Komisija provodi u skladu sa Zakonom o radu FBiH, Uredbom o postupku prijema u radni odnos u javnom sektoru na teritoriji Kantona Sarajevo, Uredbom o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i Općinama u Kantonu Sarajevo, Instrukcijom o bližoj primjeni kriterija vrednovanja prema Uredbi o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i Općinama u Kantonu Sarajevo i Pravilnikom o radu JU „Kantonalni centar za socijalni rad“.

## **Član 3.**

### **(Načela u radu Komisije)**

(1) Članovi Komisije u svom radu moraju biti nezavisni i nepristrasni, te se pridržavati načela javnosti i zakonitosti rada u skladu s Uredbom.

(2) Članovi Komisije i sekretar koji obavlja administrativno – tehničke poslove za komisiju, na konstituirajućoj sjednici potpisuju izjavu o nepristrasnosti, povjerljivosti i nepostojanju sukoba interesa, kojom potvrđuju da su upoznati sa obavezom da su tokom cijelog postupka rada u Komisiji dužni prijaviti sukob interesa i tražiti izuzeće iz rada Komisije iz razloga propisanih u članu 10. stav (1) Uredbe.

## **II –KOMISIJA**

## **Član 4.**

### **(Sastav Komisije)**

(1) Komisija je sastavljena od tri člana iz reda stručnih radnika i ima sekretara koji obavlja administrativno tehničke poslove za Komisiju.

(2) Članovi komisije moraju imati najmanje isti stepen stručne spreme kao i kandidat za čiji je prijem u radni odnos objavljen oglas.

## **Član 5.**

### **(Izuzeće članova Komisije)**

(1) U skladu sa članom 10. Uredbe, član Komisije će odmah ili najkasnije u roku od dva dana od dana saznanja za razloge izuzeća, od poslodavca zatražiti izuzeće od rada u Komisiji ukoliko je srodnik nekog od prijavljenih kandidata u pravoj ili pobočnoj liniji do četvrtog stepena i u tazbinskoj liniji do drugog stepena, bračni ili vanbračni partner, usvojlac ili usvojenik.

(2) O zahtjevu za izuzeće iz stava (1) ovog člana poslodavac donosi odluku najkasnije u roku od tri dana od dana podnošenja zahtjeva, a protiv ove odluke žalba nije dopuštena.

## **Član 6.**

### **(Zamjena člana Komisije)**

Ukoliko predsjedavajući ili neki od članova Komisije bude najmanje dva puta uzastopno spriječen da prisustvuje sjednicama Komisije, odnosno spriječen da vrši svoju dužnost, predsjedavajući Komisije ili jedan od članova će odmah obavijestiti poslodavca, radi imenovanja novog člana na tu dužnost.

## **Član 7.**

### **(Način rada Komisije)**

(1) Komisija zasjeda u punom sastavu te o svim pitanjima iz svoje nadležnosti odlučuje većinom glasova.

(2) Sastanci komisije se održavaju u prostorijama JU „Kantonalni centar za socijalni rad“ ili na nekom drugom mjestu ukoliko je isto iz opravdanih razloga potrebno obezbijediti.

- (3) Dokumentaciju koja nastane u radu Komisije potpisuju predsjednik i članovi komisije.
- (4) Administrativno-tehničke poslove za Komisiju obavlja sekretar.
- (5) O svom radu komisija vodi zapisnik, koji je sastavni dio dokumentacije, a isti potpisuju predsjednik, članovi Komisije i supervizor.

**Član 8.**  
**(Supervizor)**

- (1) Supervizor je fizičko lice, imenovano od strane Ureda za borbu protiv korupcije i Upravljanje kvalitetom Kantona Sarajevo, sa Liste supervizora koje sačinjava i vodi Ured.
- (2) Supervizor je nadležan:
  - a) da prati pravilnu primjenu odredbi uredbe prilikom provođenja postupka javnog oglašavanja za prijem u radni odnos;
  - b) da nadzire rad Komisije, na način da prati rad Komisije od njenog imenovanja;
  - c) da bude prisutan prilikom otvaranja pristiglih prijava na javni oglas;
  - d) da vrši nadzor nad otvaranjem, pregledanjem i ocjenom pristiglih prijava na javni oglas;
  - e) da nadzire postupak izbora kandidata provođenjem ispita i to pismenog i usmenog;
  - f) da obavlja i druge poslove propisane Uredbom i poslovníkom o radu Komisije.

**IV – POSTUPAK PROVOĐENJA JAVNOG OGLASA**

**Član 9.**  
**(Postupanje Komisije po pristiglim prijavama)**

- (1) Po isteku roka za podnošenje prijave na javni oglas, komisija, u prisustvu supervizora ili zamjenika supervizora, pregleda sve pristigle prijave i dostavljene dokaze, utvrđuje njihovu ispravnost (urednost, potpunost i blagovremenost) i sastavlja spisak kandidata među kojima se provodi izborni postupak.
- (2) Spisak kandidata iz prethodnog stava potpisuju svi članovi Komisije.
- (3) Komisija pisanim putem obavještava kandidate čija dokumentacija nije ispravna da nisu na spisku kandidata među kojima se provodi izborni postupak, sa navođenjem razloga zašto pristigla prijava nije ispravna, uz mogućnost uvida u dostavljenu dokumentaciju, u roku od tri dana od dana prijema obavijesti.
- (4) Kandidati čije prijave su konstatovane kao ispravne, odnosno među kojima se provodi izborni postupak bit će obaviješteni putem internet stranice Ustanove - [www.kcsr.ba](http://www.kcsr.ba) o terminu i mjestu polaganja pismenog i usmenog dijela ispita.

**Član 10.**  
**(Provođenje ispita)**

- (1) Proces izbora kandidata, među kojima se provodi izborni postupak, zasniva se na razmatranju dostavljene dokumentacije za sve kandidate, te provedenog pismenog i usmenog ispita sa svakim od kandidata, izuzev za pozicije broj: 10 i 11 za koje je predviđen samo usmeni dio ispita.
- (2) Maksimalan broj bodova koji kandidat može ostvariti na pismenom i usmenom ispitu je 100 bodova, izuzev za pozicije 10 i 11 za koje je predviđen samo usmeni dio ispita na kojem kandidat može ostvariti maksimalno 90 bodova.
- (3) Pitanja, lista propisa i literature iz oblasti iz koje će se polagati pismeni i usmeni ispit utvrđuje direktor i isti se objavljuju na web stranici Ustanove prije raspisivanja javnog oglasa.
- (4) Kandidati mogu pristupiti pismenom i usmenom ispitu samo uz predočeni identifikacioni dokument sa slikom.
- (5) Komisija će kandidata koji bude ometao provođenje ispita isključiti iz dalje procedure javnog oglasa (korištenje mobilnog telefona, razgovor u toku ispita i sl.)

### **Član 11.**

#### **(Pismeni ispit)**

- (1) Pismeni dio ispita će se provoditi za pozicije broj: 1, 2, 3, 4, 5, 6, 7, 8 i 9 iz člana 1. Poslovnika, putem testa koji se sastoji od pitanja odabranih sa liste pitanja, odnosno dokumenta koji se objavljuju na web stranici ustanove prije objave javnog oglasa.
- (2) Odabrana pitanja za pismeni dio ispita pohranjuju se u zatvorene i zapečaćene koverte prije početka pismenog ispita na koje se potpisuju svi članovi Komisije.
- (3) Pismeni ispit se vrši kroz pisani test koji ima 30/trideset/ pitanja, za koje je ponuđeno više odgovora, a samo je jedan tačan, s tim da svako pitanje nosi po 2 boda.
- (4) Maksimalan broj bodova koji je predviđen za pismeni ispit za pozicije iz stava (1) iznosi 60 bodova.
- (5) Pismeni ispit traje 60 minuta.

### **Član 12.**

#### **(Usmeni ispit za pozicije broj: 1, 2, 3, 4, 5, 6, 7, 8 i 9 )**

- (1) Komisija provodi usmeni ispit pojedinačno sa svakim kandidatom u izbornom postupku za pozicije broj: 1, 2, 3, 4, 5, 6, 7, 8 i 9, a koji su predhodno pristupili pismenom dijelu ispita.
- (2) Usmeni ispit iz stava (1) sastoji se od 4 (četiri) pitanja koja su u okviru pitanja, propisa i literature iz oblasti iz kojih se vrši polaganja pismenog i usmenog ispita, a koje su objavljene na web stranici ustanove prije objave javnog oglasa.
- (3) Usmeni ispit sa svakim kandidatom može trajati najduže 10 minuta.
- (4) Svaki član Komisije za usmeni ispit ocjenjuje kandidata ocjenom od 0 do 40.
- (5) Broj bodova koje je kandidat ostvario na usmenom ispitu predstavlja zbir bodova dodijeljen od strane svakog člana Komisije podijeljen sa tri.
- (6) Maksimalan broj bodova koji je predviđen za usmeni ispit iznosi 40 bodova.

### **Član 13.**

#### **(Usmeni ispit za pozicije broj: 10 i 11)**

- (1) Ispit za pozicije broj: 10 i 11 sastoji se samo od usmenog ispita, koji provodi Komisija pojedinačno sa svakim kandidatom u izbornom postupku.
- (2) Usmeni ispit iz stava (1) sastoji se od 3 (tri) pitanja koja su u okviru pitanja, propisa i literature iz oblasti iz kojih se vrši polaganja usmenog ispita, a koje su objavljene na web stranici ustanove prije objave javnog oglasa.
- (3) Usmeni ispit sa svakim kandidatom može trajati najduže 10 minuta.
- (4) Svaki član Komisije za usmeni ispit ocjenjuje kandidata ocjenom od 0 do 30.
- (5) Broj bodova koje je kandidat ostvario na usmenom ispitu predstavlja zbir bodova dodijeljen od strane svakog člana Komisije.
- (6) Maksimalan broj bodova koji je predviđen za usmeni ispit iznosi 90 bodova.

### **Član 14.**

#### **(Vrednovanje)**

Kandidatima, na koje se primjenjuje Uredba o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i Općinama u Kantonu Sarajevo, na ukupan broj ostvarenih bodova na pismenom i usmenom dijelu ispita dodaje se postotak od istih u skladu sa Uredbom o jedinstvenim kriterijima i pravilima za zapošljavanje branilaca, članova njihovih porodica u institucijama u Kantonu Sarajevo, Gradu Sarajevo i Općinama u Kantonu Sarajevo ("Službene novine Kantona Sarajevo" broj: 37/20 i 27/21), Instrukcijom o bližoj primjeni kriterija vrednovanja prema Uredbi o jedinstvenim kriterijima i pravilima za zapošljavanje branilaca, članova njihovih porodica u Kantonu Sarajevo, Gradu Sarajevo i Općinama u Kantonu Sarajevo ("Službene novine Kantona Sarajevo" broj: 38/20 i 28/21).

### **Član 15.**

#### **(Lista uspješnih kandidata)**

- (1) Komisija će na osnovu utvrđenih bodova, a koji predstavljaju zbir bodova osvojenih na pismenom i usmenom ispitu za pozicije broj: 1, 2, 3, 4, 5, 6, 7, 8 i 9, te bodova iz člana 14. Poslovnika sačiniti Listu uspješnih kandidata.
- (2) Komisija će na osnovu utvrđenih bodova, za pozicije broj: 10 i 11 osvojenih na usmenom ispitu, te bodova iz člana 14. Poslovnika sačiniti Listu uspješnih kandidata.
- (3) Listu uspješnih kandidata potpisuju predsjednik i članovi Komisije.
- (4) Komisija je dužna Listu uspješnih kandidata sa bodovima, zajedno sa potpisanim zapisnicima o radu Komisije, dostaviti direktoru u roku od tri radna dana nakon obavljenog usmenog ispita.

## **V - PRELAZNE I ZAVRŠNE ODREDBE**

### **Član 16.**

#### **(Objava Poslovnika)**

Komisija će Poslovnik o radu komisije dostaviti poslodavcu odmah, a najkasnije u roku od tri dana od dana donošenja, a poslodavac je dužan Poslovnik objaviti na svojoj web stranici dan nakon objavljivanja javnog oglasa, i isti će učiniti dostupnim na svojoj web stranici do donošenja odluke o prijemu u radni odnos.

### **Član 17.**

#### **(Ravnopravnost spolova)**

Odredbe ovog Poslovnika odnose se podjednako na lica muškog i ženskog spola, bez obzira na rod imenice upotrijebljen u tekstu ovog Poslovnika.

### **Član 18.**

#### **(Izmjene i dopune Poslovnika)**

Ovaj poslovnik se ne može mijenjati u toku trajanja postupka prijema u radni odnos.


### **Član 19.**

#### **(Stupanje na snagu)**


Ovaj Poslovnik stupa na snagu danom donošenja i primjenjivat će se do okončanja procedure prijema u radni odnos.

Broj: 31-01/06-120-1417.2/23  
Sarajevo, 30.08.2023. godine

Predsjednik Komisije

  
Enes Šabić, dipl. pravnik

Član Komisije

  
Amra Viteškić, dipl. socijalni radnik

Član Komisije

  
Denita Ljuca, profesor pedagogije